



食水

咱人的身軀有百分之七十是水，可見食水的重要。若是食著穢水，極加是吐瀉落；啊若無水通食，親像轎車水箱焦焦，真緊就會無命。臺灣地區有豐沛的雨水，可惜多數瀉落大海無無去！佳哉天公伯仔存好心，吩咐塗肉出手鬥相共，共四界溜旋的雨水掠入去地殼的空隙，成做一座闊莽莽的地下水庫！

古早人倚溪食溪，倚潭食潭，無水無泉的只好去揣塗趺底討。地下水囤佇深深的所在，是欲按怎款起來？虎逼著矣，頭殼常在會發珠！老祖先尾仔想出搥鼓井的好步數。鼓井水一下上(tshiünn)起來，彼款的歡喜袂輸挖著石油全款，老歲仔人喙笑目笑掌喙鬚，少年的拍嘆仔兼喝咻。

阮遐的鼓井無時行鬥加轆仔，pōo-pîn 是手勒(lik)索仔，拔桶縋落去，搥咧、掣咧，人、水恰桶仔做伙跳舞！這愛有淡薄仔技術，大喙開開的鉛桶才會認輸，乖乖仔勿落水裡。倚家倚鼓井的較好運，蹓較遠的就真克虧。毋管掙一桶，抑是擔兩桶，一逝接一逝，做新婦的逐工攏著拂甲規身軀汗。

後來有『phòng-phuh』仔通擲(jih)水，無佬久閣發明『mooh-tà』，煮食、洗盥加真快活。想袂到好好水煞予工廠的汙染拍歹去，透濫怪怪的鐵銹味恰降降的臭腥味，有想欲閣活的攏毋敢閣食！聽講八卦山跤的「紅毛井」水質真讚，載水的人相爭去排列，無疑悟新聞雄雄報講遐的水垃圾，內底驗出超磅的大腸菌，好日子無久長，天又閣烏一片！

好佳哉這馬水道管鋪透透，食水蓋利便，政府頓胸坎掛保證，請大眾安心使用！毋過眾人的心肝猶是驚驚膽膽，因為水廠摻氯(lik)落去消毒，白滾水食著煞恰地下水全款苦苦。而且厝尾頂的水塔定定積一沿塗沙，水道頭流出來的水閣不時黃晃黃晃，正常人看著攏會著生驚！

水道水無夠四序，毋才貴參參的濾水器賣了真交易(ka-iàh)，廠商趁甲油洗洗。路邊的加水站生理嘛削削叫，人頂懸閣有貼某乜單位檢驗合格的商標，講是純天然的礦泉水，甘甜好落喉，泡茶的芳氣特別厚！十箍銀橐(lok)入去，一桶 20『lip』的山泉水連鞭貯甲滇滇滇！啊水對佢位來？咻了敢有敗害？管待伊喔！相關單位若無欲插，消費者嘛無想欲知。

作者：黃文達

☆詞彙學習☆

【塗肉】thôo-bah：土壤。

【縋】luī：用繩子將東西拉上或拉下。

【加轆仔】ka-lak-á：轆轤，架在井上汲水的工具。

【沕】bit：沉、淹沒。

【pōo-pîn】：從來、平常。

【降降】kàng-kàng：刺激。

【黃晃】ng-huánn：淺黃。

☆文法學習☆

【無無去】bô-bô--khi：某些動補動詞當補語為輕聲時，可重疊動詞，變成「AAB」式，用來增強語氣。如：「拆拆破」、「掣掣斷」、「摔摔倒」等等。